



Estudu kona-ba Pilotu Ligasaun Servisu Estensionista Agríkola ho Grupu To'os-Na'in Feto

Dezembu 2020

Australian
Aid 

 **TOMAK**
To'os ba Moris Di'ak

Tabela Konteúdu

Abreviatura & Akronimu	3
Sumariú Ezekutivu	4
Relatoriú Prinsipál.....	6
1. Introdusaun.....	6
1.1. Kona-ba TOMAK	6
1.2. Kona-ba pilotu Ligasaun Estensionista Agríkola ne'e.....	6
1.3. Objetivu estudu.....	7
2. Metodolojia.....	7
2.1. Limitasaun estudu nian.....	8
3. Rezultadu Estudu.....	8
3.1. Knaar no responsabilidade servisu estensionista agríkola.....	8
3.2. Apoiu ne'ebé simu husi grupu feto sira	9
3.3. Asesu ba informasaun.....	11
3.4. Dezafiu sira	12
4. Konkluzau, Diskusaun no Rekomendasaun.....	13
Konkluzau no Diskusaun.....	13
Rekomendasaun ba jestaun servisu estensionista agríkola.....	14
Rekomendasaun husi grupu feto to'os-na'in.....	14
Aneksu 1: Guia ba FGD no Entrevista sira	15
Aneksu 2: Guia Ligasaun Servisu Estensionista Agríkola	18

Abreviatura & Akronimu

ASN	Agrikultura ne'ebé sensível ba nutrisaun
Demoplot	Parsela demonstrasaun
EA	Estensionista agríkola (Ministériu Agrikultura no Peskas nian)
EKA	Eskola kampu agrikultór
FGD	<i>Focus group discussion</i> (diskusaun grupu)
GESI	<i>Gender equality and social inclusion</i> (igualdade jéneru no inklusaun sosiál)
LKA	Loron kampu agrikultór
MAP	Ministériu Agrikultura no Peskas
M&E	<i>Monitoring and evaluation</i> (monitorizasaun no avaliasaun)
ONG	Organizasaun naun-governmentál
PAD	Prátika agríkola di'ak
PGPR	<i>Plant growth promoting mycobacteria</i> (adubu orgániku líkidu)
PNDS	Programa Nasionál Dezenvolvimentu Suku
PO	<i>Project officer</i> (ofisiál projetu)
SAPIP	<i>Sustainable Agriculture Productivity Improvement Project</i>
SEII	Sekretária Estadu ba Igualdade no Inklusaun
TOMAK	Programa To'os ba Moris Di'ak
WVTL	World Vision Timor-Leste

Sumariú Ezekutivu

Iha fulan Juñu to'o Novembru 2020, TOMAK hala'o pilotu hanesan aproximasaun ida hodi hametin komponente igualdade jéneru no inkluziun sosiál (*gender equality and social inclusion* ka GESI) husi servisu estensionista agríkola (EA) Ministériu Agrikultura no Peskas (MAP) nian. Iha pilotu ne'e, TOMAK ho MAP hili ona estensionista feto ida husi suku Balibo Vila atu fó apoiu ba tarjetu to'os-na'in feto sira no mós to'os-na'in sira ho defisiénsia. Bainhira pilotu ne'e remata, TOMAK hala'o avaliasaun ki'ik inklui diskusaun grupu ho grupu to'os-na'in feto tolu no entrevista ho EA hodi haree impaktu husi aproximasaun ne'e. Tuir mai mak rezultadu xave avaliasaun husi pilotu.

Apoiu regular/jerál husi EA ne'ebé fó ba grupu to'os-na'in feto

- Antes implementa pilotu, EA hamutuk ho TOMAK aplika ona demoplot no halo ona eskola kampu agrikultór (EKA) ho grupu to'os-na'in feto ida, To'os-na'in sira ne'e hetan koñesimentu tékniku kona-ba prátika agríkola ne'ebé di'ak (PAD) no halo ona espansaun fore-mungu. Grupua rua seluk seidak halo espansaun tanba difisil atu asesu ba bee.
- Grupua tolu ne'ebé envolve iha atividade kuda fore-mungu (grupua ida halo espansaun ho suporta husi TOMAK, grupua rua simu fini fore-mungu husi EA) uza ona sira nia rendimentu hodi sosa hahán ba família, edukasaun no ba lia.
- EA mós suporta atividade husi TOMAK no mós World Vision Timor-Leste (WVTL) relaciona ho asuntu nutrisaun inklui demo-cooking no promove kuda no konsume ai-han nutritivu inklui fehuk kór laranja, marungi, koto mean, fore-keli no fore-mungu.

Apoiu adisionál husi EA ne'ebé fó ba grupu to'os-na'in feto durante pilotu ne'e

- EA halo mapamentu ba grupu to'os-na'in feto no mós ema defisiénsia ne'ebé hela iha ninia suku hodi aumenta nia apoiu ba grupu sira ne'e. Husi mapamentu ne'e, EA identifika grupu to'os-na'in feto balu maibé EA seidak identifika to'os-na'in sira ho defisiénsia iha ninia suku maski nia konsulta ho xefe aldeia.
- EA fó tulun ba grupu to'os-na'in feto sira no fahe informasaun ba sira kona-ba oportunidade atu envolve iha programa no atividade balu. Porezemplu, EA suporta grupu balu hodi liga no hatama proposta ba TOMAK, ONG World Vision (WVTL) no programa SAPIP atu envolve iha atividade ruma no asesu ba kapasitasaun no input ka ekipamentu ruma.
- EA halo ona sorumutu ho WVTL iha sede aldeia kona-ba oinsá atu prepara proposta ba hakiak manu no fahi, no mós fahe informasaun husi SAPIP kona-ba atividade hakiak animál no kuda ai-horis lamtoro.
- EA halo monitorizasaun no kontaktu regulár ba grupu sira (vizita kada fulan dala ida ou telefone sira).

Esperiénsia husi to'os-na'in feto sira

- Maioria grupu to'os-na'in sira sente kontente kona-ba atividade nutrisaun ne'ebé EA baibain implementa hamutuk ho TOMAK no parseiru sira hanesan demo-cooking. Sira kontente ho promosaun kuda ai-han nutritivu husi WVTL, no prátika uza ai-horis husi to'os rasik hanesan fore-mungu, fehuk kór laranja, marungi, lakeru no seluk tan.
- Maioria to'os-na'in husi grupu tolu ne'e relata katak liuhusi EA nia atividade regular, sira hetan koñesimentu kona-ba PAD no koñesimentu kona-ba nutrisaun, maibé sira seidak simu treinamentu spesífiku kona-ba jéneru. Maski nune'e, to'os-na'in feto sira relata katak sira nia EA ko'alia kona-ba importánsia atu envolve feto ho mane iha agrikultura, no oinsá atu envolve feto ho mane iha prosesu foti desizaun iha uma laran kona-ba uza rendimentu.

- To'os-na'in fetu sira relata katak sira nia EA sai hanesan fonte informasaun prinsipál ba sira. En jerál to'os-na'in fetu sira nia asesu ba informasaun menus, no sira simu informasaun husi estensionista nomós dalaruma husi xefe aldeia. Sira la partisipa iha eventu iha aldeia bainhira estensionista no xefe aldeia/xefe grupu la fó hatene sira. To'os-na'in sira ne'ebé hela dook baibain simu informasaun menus liu kompara ho sira ne'ebe hela besik sira nia EA.
- Hanesan ho to'os-na'in sira seluk, grupu to'os-na'in fetu sira iha suku Balibo Vila hasoru dezafiu balun ne'ebé impede sira atu halo sira nia to'os hanesan menus ekipamentu agrikultura no fini, falta koñesimentu no kapasidade, no limitasaun seluk hanesan menus asesu ba bee no mudansa klimatika. Maioria to'os-na'in fetu sira dehan katak sira hakarak aumenta tempu EA hamutuk ho sira, maibé EA mós enfrenta difikuldade atu hasoru beibeik grupu sira ne'e.

Rekomendasaun

Rezultadu avaliasaun ida ne'e sujere atu integra aproximasaun husi EA sira, ne'ebé mak simu ona formasaun no akompañamentu atu inklui aproximasaun GESI iha sira nia atividade lor-loron, nune'e bele efetivu liu. Konsidera ho rezultadu prinsipál sira ne'e, tuir mai sujestaun ba rekomendasaun sira.

Rekomendasaun ba jestaun servisu estensionista agríkola

- TOMAK tenke promove estratéjia durante treinamentu no akompañamentu regular ne'ebé fó ba EA sira hodi sira bele integra inkluziun jéneru no defisiénsia iha sira nia servisu lor-loron ho to'os-na'in sira. Ida ne'e tenke inklui:
 - Aumenta EA sira nia koñesimentu no relasaun ho organizasaun/servisu lokál ne'ebé fó apoiu ba fetu sira no ema ho defisiénsia sira, hodi EA sira bele liga to'os-na'in sira ho servisu sira ne'e wainhira presiza.
 - Dezenvolve EA sira nia kapasidade hodi fó apoiu ba to'os-na'in sira ho defisiénsia liuhusi koñesimentu adisionál kona-ba oinsá atu rekoñese neseseidade husi ema ho defisiénsia oiain, no aproximasaun spesífiku sira bele uza hodi asegura katak ema ho defisiénsia bele partisipa no hetan benefísiu husi EA nia servisu.
 - Hasa'e EA nia abilidade hodi fó apoiu ne'ebé inklusivu ba to'os-na'in fetu sira liuhusi estratéjia ne'ebé bele hasa'e fetu sira nia asesu no partisipasaun ativu liu iha atividade.
 - Durante akompañamentu regular ho EA sira, porezemplu durante enkontru mensál, fó oportunidade ba EA sira atu refléta ba suporta spesífiku sira fó ba to'os-na'in fetu no to'os-na'in ho defisiénsia sira. Fó mós oportunidade atu diskute aproximasaun ne'ebé dí'ak liu hodi inklui grupu tarjetu sira ne'e iha sira nia atividade, no fó dala ba sira atu buka apoiu ka sujestaun ruma husi TOMAK se karik presiza.
- TOMAK tenke halo advokasia no fó mós apoiu spesífiku ba lideransa MAP nian hodi enkoraja MAP atu promove aproximasaun inklusivu (GESI) iha ninia servisu estensaun tomak.

Rekomendasaun husi grupu fetu to'os-na'in

- Servisu estensionista agríkola no parseiru sira seluk atu kontinua fó treinamentu no kapasitasaun ba grupu to'os-na'in fetu iha área tekniku, nutrisaun, agronegósio, GESI, no mós hodi ajuda sira asesu ba oportunidade sira seluk (halo proposta).

Relatoriú Prinsipál

1. Introdusaun

1.1. Kona-ba TOMAK

Programa To'os Ba Moris Di'ak (TOMAK) nu'udar programa ida ne'ebé foka ba vida moris agrikultura iha Timor-Leste ho durasaun tinan lima (ho opsaun atu kontinua tinan lima tán) no fundus ne'ebé hetan husi Governu Austrália. Programa ne'e nia alvu atu asegura katak uma-kain rurais bele moris ho prosperu no sustentavel liu. TOMAK sei atinji ida ne'e liuhusi atividade sira ne'ebé iha objetivu atu:

- Estabelese baze ba seguransa ai-han no nutrisaun di'ak ba uma-kain rurais (Komponente 1): no mós
- Harii sira nia kapasidade hodi bele partisipa ho konfiansa iha merkadu agríkola (Komponente 2).

Komponente 1 (Seguransa Ai-han no Nutrisaun) promove aproximasaun agrikultura ne'ebé sensível ba nutrisaun (ASN) hodi hasa'e disponibilidade no utilizaun ba ai-han nutritivu. Komponente 2 (Dezenvolvimentu Sistema Merkadu) promove agrikultura komersiál liuhusi aproximasaun dezenvolvimentu sistema merkadu. Igualdade jéneru no inkluziun sosiál integra iha atividade sira hotu no estensionista MAP nian envolve iha implementasaun ba komponente rua hotu no mós atividade GESI nian.

1.2. Kona-ba pilotu Ligasaun Estensionista Agríkola ne'e

Programa TOMAK nia ekipa GESI hala'o pilotu hanesan aproximasaun ida hodi hametin MAP nia servisu estensaun agríkola hodi fó apoiu ba to'os-na'in fetu sira no mós to'os-na'in ho defisiénsia sira. Maski maioria fetu mak hola parte barak husi populasaun hanesan to'os-na'in no kuaze ema ida husi ema na'in hitu iha mundu mak ema ho defisiénsia, servisu EA barak mak seidauk uza aproximasaun inklusivu tanba ida ne'e sai hanesan oportunidade di'ak ba EA sira hodi fornese suporta ba to'os-na'in sira ne'ebé mak sai hanesan tarjetu.

EA fetu ida mak hili ona atu lidera suku Balibo Vila no atu aproxima implementasaun ba pilotu ida ne'e. EA iha suku tolu iha viziñu seluk sei observa, aprende no implementa bainhira iha possibilidade, maibé, laiha suporta espesífiku ne'ebé mak fornese ba sira durante iha periode pilotu ne'e. EA ne'ebé mak lidera sei fornese suporta ba tarjetu to'os-na'in fetu sira no mós to'os-na'in sira ho defisiénsia, inklui halo ligasaun ho sira hodi fó assistensia no oportunidade ne'ebé mak apropriadu. EA ne'e hetan \$20 ba pulsa telemovel kada fulan hodi suporta implementa sira nia papél no responsabilidade ne'ebé mak haruka ona tuir guia ida ne'e. Pilotu ida ne'e implementa ona iha fulan neen (6) nia laran, molok atu halo desizaun kona-ba possibilidade atu implementa aproximasaun ida ne'e ho EA sira seluk.

Pilotu ida ne'e ho objetivu fornese tarjetu hodi suporta ba to'os-na'in fetu sira no mós to'os-na'in sira ho defisiénsia. Suporta tarjetu ba to'os-na'in hirak ne'e importante hodi sira bele hetan asesu ne'ebé di'ak liu tan no suporta liu husi servisu estensionista ho konkordánsia husi MAP ho objetivu ne'ebé mak hamosu ona iha Deklarasaun Maubisse. ¹

¹ Deklarasaun Maubisse mak mekanizmu ida hodi asegura akontabilidade husi Governu hodi elimina tipu diskriminasaun hotu ne'ebé impaktu fetu rural sira, no promove sira nia kontribuisaun másimu ba iha prosesu dezenvolvimentu ekonomiku iha Timor-Leste. Governu Konstituisional ba dala 8 adopta ona Deklarasaun Maubisse segundu (2018-2023) iha dia 12 de Outubru 2018 no instituisaun 17 asina ona deklarasaun ida ne'e.

Atu realiza ida ne'e estensionista iha knaar no responsabilidade prinsipál ne'ebé nia tenke halo mak hanesan:

- Halo mapamentu hodi identifika populasaun tarjetu
- Fornese suporta ba tarjetu (to'os-na'in fetu sira no to'os-na'in ho defisiénsia)
- Liga to'os-na'in sira ne'e ho asisténsia estensaun ne'ebé mak apropriadu
- Promove komunikaun di'ak no fahe informasaun kona-ba prosesu foti desizaun iha família ho to'os-na'in sira hotu
- Fó atensaun ba servisu to'os-na'in fetu sira no ema ho defisiénsia sira
- Halo monitorizasaun ba fornese suporta seluk
- Fahe informasaun relevantes kona-ba prevensaun COVID-19 ho to'os-na'in sira

Knaar sira ne'e deskreve iha matadalan ligasaun servisu estensionista agríkola hanesan iha Aneksu 2.

1.3. *Objetivu estudu*

Objetivu husi estudu ida ne'e mak atu avalia impaktu husi ligasaun servisu estensionista agríkola fetu ho grupu fetu to'os-na'in sira. TOMAK iha hanoin hala'o estudu ki'ik ida hodi buka hatene karik atividade pilotu ida ne'e bele tulun no benefísia ba sira.

Informasaun sira ne'ebé hetan husi estudu ne'e, atu ajuda TOMAK no MAP foti desizaun kona-ba kontinuasaun servisu estensionista atu hakbesik ba grupu to'os-na'in fetu sira, no atu hatene kle'an liután kona-ba dezafiu saida mak sira enfrenta no tulun sira buka solusaun.

2. Metodolojia

Estudu ne'e uza metodu kualitativu inklui halo diskusaun grupu (*focus group discussion* ka FGD) ho grupu fetu tolu husi aldeia Fatuklaran, Fatululik no Atara, iha suku Balibo Vila, postu administrativu Balibo iha munisípiu Bobonaro. Ekipa avaliasaun mós halo entrevista semi-struturadu ho estensionista suku Balibo Vila. Tabela 1 hatudu némeru partisipante sira iha estudu ne'e.

Tabela 1. Partisipantes ne'ebé partisipa iha estudu

Aldeia/naran grupu	Totál partisipantes	Metodu estudu
Grupú husi aldeia Atara	5	FGD
Grupú husi aldeia Fatululik	8	FGD
Grupú husi aldeia Fatuklaran	10	FGD
Estensionista suku Balibo Vila	1	Entrevista semi-struturadu

Estudu ne'e hetan apoiu koordenaun husi estensionista suku Balibo Vila no hala'o iha data 10-11 fulan Dezembru 2020, no kontinua iha data 18 fulan Janeiro 2021. Diskusaun grupu fasilita husi TOMAK nia ekipa M&E, no TOMAK nia ofisial projetu (*project officer* ka PO) hakerek notas no halo gravasaun.

Iha matadalan perguntas inklui konsentimentu/aseitasaun katak membru grupu ne'ebé partisipa iha diskusaun grupu aseita atu partisipa iha diskusaun hodi fó informasaun. Fasilitadór esplika ba partisipante kona-ba objetivu husi estudu, katak sira partisipa voluntariu no livre atu ko'alia tanba iha relatóriu la mensiona naran partisipante ne'ebé fó informasaun (Aneksu 1).

Analiza dados no hakerek relatóriu husi Jestór M&E TOMAK nian iha lian Tetun ho tulun husi Asesóra M&E no Espesialista Jéneru TOMAK nian. Relatóriu ne'e mós hetan revizaun husi Espesialista Jéneru Nasionál no Espesialista Komunikaun TOMAK nian, depois tradús ba lian Inglés.

2.1. Limitasaun estudu nian

- Durante halo FGD sira, partisipante balun ladún ko'alia, maski fasilitadór enkoraja sira atu ko'alia. Entaun baibain xefe grupu mak partisipa ativu liu iha diskusaun. Tanba ne'e, ekipa fasilitadór diskusaun grupu ladún hetan informasaun barak.
- FGD ne'ebé fasilita husi ekipa avaliasaun (TOMAK nia Jestor M&E, Asesora M&E no mós Espesialista Jéneru) hala'o ba grupu to'os-na'in fetu rua, no TOMAK nia PO sira fasilita FGD ba grupu to'os-na'in fetu ida, tanba limitasaun tempu no rekursus.
- Avaliasaun foka liu ba EA ne'ebé mak lidera ligasaun iha pilotu ne'e. Ekipa avaliasaun la halo entrevista ho EA na'in tolu seluk ne'ebé partisipa hotu iha treinamentu maibé la simu suporta.
- Dalaruma, susar atu determina atividade ne'ebé EA mak halo hanesan nia servisu regular hamutuk ho TOMAK no parseiru sira, no atividade adisionál nia hala'o hanesan parte ida iha pilotu ne'e. Dalaruma EA mós konfuzsaun uitoan no kahur hamutuk buat sira ne'e wainhira nia fahe ninia esperiénsia.

3. Rezultadu Estudu

3.1. Knaar no responsabilidade servisu estensionista agríkola

Dever ida husi deskrisaun knaar no responsabilidade servisu EA nian mak tulun grupu agrikultura no asosiasaun grupu agrikultura sira atu halo diagnóstiku ba problema ka obstaklu naka'it ho agrikultura no propoin solusaun sira mak apropriadu. Ho ida ne'e TOMAK inísia halo pilotu ho aproximasaun atu haforsa GESI liu husi fetu nia servisu hanesan EA ho grupu to'os-na'in fetu sira no mós ema ho defisiénsia hodi identifika obstaklu saida mak sira hasoru no buka dalan atu resolve obstaklu sira ne'e.

Atu realiza objetivu hodi suporta to'os-na'in fetu tarjetu sira atu bele hetan asesu ne'ebé di'ak liu, TOMAK (GESI) fornese treinamentu ba estensionista na'in haat kompostu husi estensionista ne'ebé lidera pilotu ida ne'e iha suku Balibo Vila no estensionista seluk na'in tolu husi suku viziñu hanesan suku Cowa, Leohitu no Batugade. Treinamentu ne'e inklui introdús prosesu no knaar estensionista nian iha atividade pilotu, realiza enkontru dala sia ho Diretór MAP atu identifika potenciál estensionista fetu tuir kriteria ne'ebé define ona, halo mapamentu ho estensionista lidera pilotu, no halo monitorizasaun kada fulan husi TOMAK.

EA nia área responsabilidade mak iha suku Balibo Vila, postu administrativu Balibo, munisípiu Bobonaro. Nia responsabiliza ba grupu fetu haat iha aldeia haat iha suku Balibo Vila, kada grupu iha membru na'in 12-16. Antes implementa atividade pilotu ne'e estensionista hala'o nia knaar hanesan baibain, forma grupu to'os-na'in envolve fetu no mane iha grupu no fó assisténsia ba sira. Bainhira halo selesaun ba suku ne'ebé possibilidade atu implementa pilotu ne'e, suku Balibo Vila mak bele prienxe kriteria hanesan tenke estensionista fetu no iha grupu to'os-na'in fetu sira. Estensionista relata katak antes ne'e nia grupu to'os-na'in sira kahur fetu ho mane maibé bainhira implementa pilotu ne'e, nia foka liu ba to'os-na'in fetu sira ne'ebé forma ona iha grupu.



Figura 1. Estensionista suku halo mapamentu hamutuk ho grupu to'os-na'in fetu sira.

Servisu estensionista antes implementa pilotu, hamutuk ho parseiru desenvolvimentu sira hanesan TOMAK, World Vision no SAPIP fornese apoiu tékniku agrikultura nian nomós fahe informasaun kona-ba nutrisaun ba to'os-na'in sira. TOMAK hamutuk ho estensionista implementa demoplot no aplika tékniku PAD ne'ebé TOMAK rekomenda liu husi eskola kampu agrikultór (EKA) no lora kampu agrikultór (LKA).

3.2. Apoiu ne'ebé simu husi grupu fetu sira

Bainhira implementa pilotu, estensionista kontinua fó apoiu ba to'os-na'in grupu fetu hodi tuur hamutuk ho sira atu identifika sira nia nesesidade relasiona ho moris nu'udar agrikultura nian. Lihusi diskusaun ho grupu to'os-na'in fetu, EA mak fahe informasaun adisionál kona-ba apoiu ne'ebé disponivel husi parte oioin iha sira nia suku. Estensionista hatete katak to'os-na'in fetu sira haree husi to'os-na'in balun iha suku seluk husi postu Bobonaro, utiliza lona hodi kolleita udan-been, ho nune'e liu-liu grupu rua ne'ebé ladún asesu ba bee, husu apoiu estensionista atu halo proposta ba ONG atu fornese lona kolleita udan been.

EA mós ajuda to'os-na'in sira hodi liga no hatama proposta ba TOMAK (grupu ida partisipa ona iha TOMAK Komponente 2 nia atividade no habelar tan sira nia produsaun fore-mungu) hodi buka informasaun kona-ba envolvimentu iha atividade kuda fore-rai, fore-mungu no liis. Ba grupu rua ne'ebé partisipa ona iha atividade FFS ba fore-mungu atu kontinua ba iha TOMAK nia atividade espansaun, grupu sira tenke kobre 50% husi kustu espansaun (bazeia ba TOMAK nia kriteria ba selesaun ba to'os-na'in espansaun sira). Grupu sira ne'e sei konsidera atu kontinua ho atividade ne'e ka lae tanba presiza investe sira nia osan rasik no sira mós enfrenta problema bee iha sira nia rai. Grupu rua ne'ebé seidauk partisipa iha atividade demoplot, sira sei utiliza fini balu ne'ebé sira simu husi EA hodi kuda rasik iha sira nia to'os, no hetan rezultadu di'ak ba fa'an hodi sosa hahán ba família no responde ba oan nia nesesidade eskola.

Aleinde apoiu fini no tékniku ne'ebé fornese husi TOMAK, to'os-na'in sira relata katak sira aprende mós kona-ba ai-han grupu tolu no aplika hahalok nutrisaun iha família liu husi atividade nutrisaun no demo-cooking ne'ebé fornese husi TOMAK, WVTL no sira nia EA. Grupu fetu rua hatete katak sira kontente ho atividade demo-cooking tanba utiliza ai-han lokál ne'ebé sira iha hanesan lakeru, fore sira, marungi no seluk tan. Sira mós reafirma katak bainhira atividade ne'e remata, sira koko rasik ho família maibé sira la prátika beibeik tanba depende mós ba asesu ai-han sira ne'e, liga ho tempu produsaun ba ai-horis sira no mós orsamentu atu sosa ai-han sira ne'e.

“Prátika demo-cooking, ami aprende ona husi TOMAK no estensionista, te'in lakeru, nu'u, ho fore-mungu, bainhira sira fila ami halo rasik to'o agora halo dala haat tuir tempu lakeru tasak.” - To'os-na'in grupu fetu husi aldeia Atara

Grupú to'os-nain fetu ida mós partisipa iha atividade ida iha sede aldeia hamutuk ho WVTL no sira nia EA. Membru grupu ne'ebé partisipa relata katak WVTL husu sira atu kuda marungi no sira mós hetan informasaun kona-ba oinsá atu haruka proposta kona-ba hakiak manu ba WVTL. Grupú ne'e submete ona proposta maibé seidauk hetan resposta. Aleinde ne'e grupu seluk hatete katak WVTL hamutuk ho estensionista mai iha sira nia grupu halo jerminasaun fini no kompos ho demoplot, hamutuk sira mai dala haat ona. Liu tiha ida ne'e WVTL ho estensionista seidauk mai, xefe grupu mak organiza de'it membru sira hodi halo planu rasik no halo proposta ba WVTL kona-ba hakiak manu, maibé to'o agora seidauk hetan resposta.

Grupú to'os-na'in fetu sira ne'e mós buka apoiu husi SAPIP. Ho apoiu husi sira nia EA, sira halo ona proposta ba SAPIP kona-ba hakiak animál no kuda ai-horis lamtoro. SAPIP prosesa ona grupu husi Cailaco ho Maliana, maibé seidauk halo desizaun kona-ba Balibo. Grupú sira reafirma tán katak sira pruntu atu hein rezultadu husi proposta ne'e.

Atividade Jéneru

To'os-na'in sira relata katak durante pilotu ne'e sira seidauk iha treinamentu espesífiku kona-ba jéneru nian. Xefe grupu klarifika katak sira nia membru seidauk hetan treinamentu espesífiku kona-ba jéneru nian maibé estensionista sempre ko'alia kona-ba fetu ho mane nia envolvimentu halo to'os, no husu sira atu kria grupu fetu agrikultór.

Iha parte seluk grupu fetu ida mak informa katak sira rona informasaun kona-ba jéneru liu husi xefe grupu ne'ebé partisipa iha treinamentu husi SEII no PNDS koopera ho WVTL. Xefe grupu ne'e enkoraja nia membru sira katak fetu mós bele halo to'os atu hetan osan.

En termus de foti desizaun iha uma-kain kona-ba uza osan, to'os-na'in sira relata katak fetu ho mane deside hamutuk kona-ba sasán nia folin boot, maibé la deside hamutuk ba sasan ne'ebé folin ki'ik. Fetu ho mane ko'alia ba malu hodi deside investe ba to'os, edukasaun, no ba lia, fetu mak deside kona-ba sosa hahán ba família atu han.

Ba oin estensionista, sei halo treinamentu kona-ba PGPR (adubu orgániku líkidu) no to'os-na'in husi aldeia Fatululik no Fatuklaran mak husu ba estensionista atu fornese treinamentu. Sira prepara ona material hanesan ai-bubur, terasi, ikan tri, no masin midar. Estensionista relata mós katak nia sei buka nafatin suporta husi MAP, TOMAK, WVTL no SAPIP atu bele hetan apoiu ba grupu to'os-na'in fetu sira ne'e. Informasaun ne'e konfirma mós husi to'os-na'in sira.

3.3. Asesu ba informasaun

To'os-na'in feto sira relata katak sira nia EA sai hanesan fonte informasaun prinsipál ba sira. Jeralmente to'os-na'in sira relata katak, sira rona informasaun dalabarak liu husi estensionista suku, dalaruma de'it mak rona husi xefe aldeia. Informasaun ne'ebé rona husi xefe aldeia mak hanesan informasaun jerál husi ONG deservimentu balun nomós husi governu lokál/xefe suku. Informasaun husi EA mak hanesan atividade implementa husi ONG ka ajénsia balun ne'ebé koopera ho MAP hanesan TOMAK, SAPIP, Avansa no seluk tan. To'os-na'in sira relata katak bainhira iha atividade ruma iha aldeia, estensionista mak mai fó hatene iha xefe grupu mak xefe grupu fó hatene ba membru sira. Grupú to'os-na'in rua mak nia lokalizasaun dook husi suku no dook husi estensionista, aleinde ne'e grupu ida seluk maski besik iha suku, sira mós asesu informasaun liu husi estensionista.



Figura 2. Enkontru ho estensionista, ofisial projetu TOMAK ho grupu feto to'os-na'in sira

“Ami hatene ho estensionista de'it, ami atu hato'o fali informasaun mós liu husi estensionista, ema seluk ami lahatene, se karik estensionista la mai fahe informasaun, ami lahatene atu informa ba sé.” - Xefe grupu feto to'os-na'in aldeia Atara

Baibain estensionista informa ba sira bainhira ONG sira mai atu implementa atividade balun iha sira nia suku, estensionista sempre akompaña durante implementa atividade. Maibé bainhira atividade balun iha aldeia, xefe aldeia mak informa ba xefe grupu, dalaruma informa direta ba membru sira. Maibé sira reafirma tán katak dalaruma ONG balun hala'o tiha ona atividade hafoin sira rona ikus. Situasaun hanesan ne'e halo membru grupu to'os-na'in dalabarak la partisipa iha eventu balun iha aldeia tanba laiha informasaun.




Figura 3. Flowchart kona-ba to'os-na'in sira asesu ba informasaun iha suku/aldeia

Iha parte seluk maioria to'os-na'in sira hato'o katak sira rona informasaun kona-ba surtu COVID-19 liuhusi fonte oioin. Sira relata katak antes TOMAK mai fahe material sira rona uluk husi WVTL, Ministerio da Saúde, no mídia sosiál (Facebook no televizaun). Sira hotu hatene kona-ba oinsá halo prevensaun komesa hahú husi prepara tippy tap iha ida-idak nia uma-kain, fase liman ho sabaun beibeik, uza maskara, halo distánsia sosiál no hela iha uma.

3.4. Dezafiu sira

Dezafiu ba EA hodi fó apoiu ba grupu to'os-na'in fetu no ema ho defisiénsia sira:

- Wainhira EA halo mapamentu ba grupu fetu to'os-na'in no ema ho defisiénsia sira iha ninia suku, nia ko'alia ho xefe aldeia maibé sira la identifika to'os-na'in ho defisiénsia ruma. Maibé EA foka de'it ba ema ho defisiénsia fíziku, entaun karik la konsidera ema ho defisiénsia sira seluk ne'ebé hela iha ninia área. Tanba ne'e, susar atu avalia EA nia kapasidade hodi fó apoiu ba to'os-na'in ho defisiénsia sira.
- Maski estensionista hamutuk ho grupu to'os-na'in sira identifika ona problema no obstaklu sira ne'ebé sira enfrenta, difisil atu responde ba nesesidade sira hotu. EA ajuda grupu sira hodi prepara proposta sira maibé dalaruma grupu sira he'in governu ka ajénsia sira nia resposta, ou sira nia proposta la aseita.
- Ligasaun entre EA, organizaun fetu no servisu sira seluk ne'ebé suporta fetu sira no ema ho defisiénsia seidak forte, no to'os-na'in fetu sira la mensiona referál ba servisu sira ne'e. EA foka liu ba aumenta no hadi'a ninia servisu rasik ho grupu sira ne'e duké halo referál.
- Bainhira atu halibur to'os-na'in sira hamutuk iha fatin ida ba tempu naruk hanesan atu fó treinamentu ba sira, presiza fornese mós ai-han balun (laiha orsamentu ba ida ne'e).
- Distánsia to'os ne'ebé dook dalaruma difisil ba estensionista atu ba vizita, nu'udar fetu ladún sente seguru atu viajen mesak, maski motorizada iha.
- EA mós enfrenta dezafiu hanesan estensionista sira seluk hanesan facilidade menus, nia baibain envolve iha atividade barak, no nia hanesan ema ida de'it tenke kobre área boot no barak.

Dezafiu ba grupu to'os-na'in fetu sira:

- To'os-na'in fetu husi grupu rua relata katak sira hakarak estensionista atu fó apoiu másimu ba sira maibé EA preokupa ho nia knaar lor-loron hanesan estensionista, envolve mós iha atividade seluk ne'ebé implementa husi parseiru dezenvolvimentu.
- Grupu to'os-na'in fetu dehan katak sira nia koñesimentu kona-ba oinsá atu halo proposta ba parseiru ONG sei menus, no husu estensionista sei fo tulun ba sira hodi halo proposta.
- Tempu to'os-na'in sira hasoru malu ho EA ladún koresponde ba malu tanba to'os-na'in sira preokupa ho atividade lor-loron hanesan ba to'os, lori produktu ba fa'an, no atende atividade kultura. Iha parte seluk estensionista relata katak nia vizita grupu sira dala ida iha fulan ida, bainhira la ba vizita grupu kontaktu liu husi telefone.
- Ba to'os-na'in sira ne'ebé iha hela iha área remotas ladún hetan infomasaun, sira sente hanesan marjinalizadu bainhira xefe aldeia la mai fó hatene sira kona-ba atividade ruma. Dalaruma sira rona informasaun husi ema balun maibé sira la participa tanba sira sente sira nia an ladún importante atu participa iha eventu iha aldeia (signifika sira participa iha eventu bainhira estensionista ou xefe aldeia mak fó hatene).
- Grupu fetu rua enfrenta problema jerál relasiona ho agrikultura inklui la iha asesu ba bee, tanba ne'e difisil atu halo demoplot fore-mungu ka fore-rai iha sira nia to'os.
- Mudansa klimatika sai hanesan fatór ida ne'ebé fó impaktu ba rezultadu fore-mungu husi grupu to'os-na'in iha aldeia Atara.

4. Konkluziun, Diskusaun no Rekomendasiaun

Konkluziun no Diskusaun

Liga ho servisu EA nia knaar ida mak tulun to'os-na'in sira hodi identifika obstaklu sira no buka dalan ba solusaun, TOMAK enkaixa atividade uza aproximasaun GESI ho estensionista fetu hahú ho pilotu iha suku Balibo Vila. Atu haforsa servisu EA nian ho atividade pilotu ne'e, TOMAK GESI fornese treinamentu kona-ba halo mapamentu atu identifika grupu to'os-na'in fetu no ema ho defisiénsia, no identifika obstaklu ne'ebé grupu sira enfrenta iha agrikultura no tulun atu buka solusaun. Treinamentu envolve EA na'in haat, estensionista na'in tolu seluk mai husi suku viziñu ho objetivu katak sira atu observa no aplika ho sira nia grupu to'os-na'in bainhira iha oportunidade. Maski nune'e EA iha suku Balibo Vila seidak identifika ema ho defisiénsia iha ninia suku hodi fó apoiu ba sira.

Kooperasaun entre TOMAK no EA MAP nian halo ona iha suku Balibo Vila desde inisiu hahú programa TOMAK liu husi komponente rua ne'e (Komponente 1: Seguransa ai-han no nutrisaun, Komponente 2: Agrikultura komersiál). Ida ne'e inklui atividade hanesan implementa demoplot fore-mungu liu husi EKA no LKA, no apoiu halo espansaun ba grupu to'os-na'in fetu ida. EA nia atividade mós inklui fó treinamentu no fahe fini fore-mungu, fore-rai, no liis iha grupu tolu ne'e. Atividade seluk hamutuk ho TOMAK implementa prátika demo-cooking uza ai-han lokál husi to'os rasik. Iha parte seluk EA mós koopera ho WVTL hodi promove ai-han nutritivu hanesan koto, fore, no fehuk kór laranja.

Estensionista relata katak bainhira implementa pilotu, nia kontinua fó apoiu ba grupu sira liu husi ba vizita iha fulan ida dala ida, ka liu husi telefone. Atividade ne'ebé nia halo bainhira hamutuk ho to'os-na'in sira mak ajuda sira hodi liga ho programa no organizasaun sira (inklui SAPIP, TOMAK no WVTL) no suporta sira hodi prepara no submete proposta ne'ebé relevante ba sira. EA relata katak nia ajuda to'os-na'in fetu sira hodi prepara proposta ba WVTL kona-ba hakiak fahi ho manu, no proposta ba SAPIP kona-ba hakiak animal no kuda ai-horis lamtoro. Iha momentu avialasaun ne'e hala'o ona, EA no to'os-na'in fetu sira seidak hatene rezultadu husi proposta sira ne'e (aseita ka lae).

Maski estensionista fornese ona apoiu balun ba grupu sira, to'o agora to'os-na'in sira seidak simu treinamentu spesífiku kona-ba jéneru. Maibé to'os-na'in sira dehan katak sira hatene husi estensionista kona-ba envolvimentu fetu ho mane iha agrikultura no foti desizaun iha uma laran kona-ba oinsá atu uza rendimentu. Asuntu sira ne'e liga mós ho igualdade jéneru no hatudu katak EA mós iha konfiansa atu integra topiku ne'e iha diskusaun ho to'os-na'in sira.

Grupu to'os-na'in ida espresa sira nia sentimentu kontente ho apoiu husi sira nia EA, maibé grupu to'os-na'in rua seluk hakarak hetan apoiu másimu husi estensionista no hanoin katak EA preokupa ho nia servisu lor-loron no dalaruma tenke fó apoiu ba parseiru seluk ne'ebé presiza. Nune'e mós lokalizasaun aldeia ne'ebé dook ladún seguru ba nia nu'udar estensionista fetu atu vizita beibeik.

Iha pilotu ne'e, EA sai fonte informasaun importante ba grupu to'os-na'in fetu. Sira nia asesu ba informasaun baibain menus, maibé sira hetan informasaun liu husi estensionista de'it no dalaruma liu husi xefe aldeia. Ho distánsia ne'ebé dook no preokupa ho atividade lor-loron halo sira difisil atu partisipa iha eventu balun iha suku/aldeia. Maibé sira sei interese atu envolve iha atividade ruma hodi ajuda sira ho problema ne'ebé sira baibain enfrenta, inklui bee menus no mudansa klimatika ne'ebé bele impede sira atu halo atividade agrikultura.

Husi rezultadu avialasaun hetan sujestaun katak, to'os-na'in apresia tebes ho apoiu tékniku ne'ebé sira simu husi ligasaun EA. Maski nune'e apoiu sira ne'e dalabarak liu husi vizita servisu EA ba to'os-na'in sira, nu'udar EA nia knaar baibain, la'ós tanba tarjetu intervensaun GESI nian. Razaun ba ida ne'e mak tempu ho lojistiku sai hanesan dezafiu ida, ne'ebé la permite EA atu hala'o nia servisu ho másimu, hodi fó apoiu ba to'os-na'in husi nia área servisu ba. Ho ida ne'e mak rezultadu avialasaun

sujere atu integra aproximasaun husi EA sira, ne'ebé mak simu ona formasaun no akompañamentu atu inklui aproximasaun GESI iha sira nia atividade lor-loron, nune'e bele efetivu liu. Konsidera ho rezultadu prinsipál sira ne'e, tuir mai sujestaun ba rekomendasaun sira.

Rekomendasaun ba jestaun servisu estensionista agríkola

- TOMAK tenke promove estratéjia durante treinamentu no akompañamentu regular ne'ebé fó ba EA sira hodi sira bele integra inkluzau jéneru no defisiénsia iha sira nia servisu lor-loron ho to'os-na'in sira. Ida ne'e tenke inklui:
 - Aumenta EA sira nia koñesimentu no relasaun ho organizaun/servisu lokál ne'ebé fó apoiu ba feto sira no ema ho defisiénsia sira, hodi EA sira bele liga to'os-na'in sira ho servisu sira ne'e wainhira presiza.
 - Dezenvolve EA sira nia kapasidade hodi fó apoiu ba to'os-na'in sira ho defisiénsia liuhusi koñesimentu adisionál kona-ba oinsá atu rekoñese nesesidade husi ema ho defisiénsia oioin, no aproximasaun espesífiku sira bele uza hodi asegura katak ema ho defisiénsia bele partisipa no hetan benefísiu husi EA nia servisu.
 - Hasa'e EA nia abilidade hodi fó apoiu ne'ebé inklusivu ba to'os-na'in feto sira liuhusi estratéjia ne'ebé bele hasa'e feto sira nia asesu no partisipasaun ativu liu iha atividade.
 - Durante akompañamentu regular ho EA sira, porezemplu durante enkontru mensál, fó oportunidade ba EA sira atu refleta ba suporta espesífiku sira fó ba to'os-na'in feto no to'os-na'in ho defisiénsia sira. Fó mós oportunidade atu diskute aproximasaun ne'ebé di'ak liu hodi inklui grupu tarjetu sira ne'e iha sira nia atividade, no fó dala ba sira atu buka apoiu ka sujestaun ruma husi TOMAK se karik presiza.
- TOMAK tenke halo advokasia no fó mós apoiu espesífiku ba lideransa MAP nian hodi enkoraja MAP atu promove aproximasaun inklusivu (GESI) iha ninia servisu estensaun tomak.

Rekomendasaun husi grupu feto to'os-na'in

- Servisu estensionista agríkola no parseiru sira seluk atu kontinua fó treinamentu no kapasitasaun ba grupu to'os-na'in feto iha área tekniku, nutrisaun, agronegósiu, GESI, no mós hodi ajuda sira asesu ba oportunidade sira seluk (halo proposta).

Aneksu 1: Guia ba FGD no Entrevista sira

GUIA FGD BA GRUPO TO'OS NA'IN FETO SIRA

Konsentimentu/Aseitasaun

Helo, ha'u nia naran (entrevistador) no ha'u nia kolega (karik iha) ohin ami mai iha ne'e atu dada lia uitoan no rona ita-boot sira nia lian, kona-ba atividade ligasaun servisu estensionista agrikultura ne'ebé halo pilotu iha postu administrativu Balibo, suku Balibo Vila. Durante fulan 6 ona estensionista mai iha ita nia grupu no halo enkontru hodi fó tulun ba ita-boot sira atu responde ba ita-boot sira nia nesisidade nu'udar feto agrikultór/halo to'os.

Agora ami mai atu haree nia progresu oinsá, saida mak la'o di'ak no saida mak la'o la di'ak ne'ebé presiza atu hadi'a ba oin mai. Maizumenus oras ida ho balun atu ko'alia ho ita-boot sira. Ita-boot sira livre atu ko'alia tuir buat ne'ebé mak imi aprende ona, no saida mak la'o di'ak no la la'o di'ak.

Informasaun ne'ebé ita fó segredu, entre ekipa avaliasaun de'it no sei uza de'it ba programa TOMAK. Ita hakarak atu entrevista? Sim ou lae?

(Entrevistador sei hapara atu entrevista se karik respondente lakohi atu partisipa)

(Prepara template ba registrasaun partisipantes)

1. Atividade saida mak ita-boot sira halo hamutuk ho estensionista iha fulan 6 ikus ne'e?
(Ezemplu: enkontru hodi diskute nesesidade ka difikuldade. Enkoraja feto atu uza oportunidade hato'o sira nia hanoin no iha iniciativa atu buka asisténsia ba sira nia nesesidade nu'udar agrikultór, sst.)
2. Oinsá ita-boot sira nia hanoin kona-ba atividade ne'e? Ajuda duni ita-boot sira? Karik lae tanba sá?
3. Oinsá identifika ita-boot sira nia difikuldade ka nesesidade sira?
 - Halo mesak ka ho apoiu husi estensionista? Horibainhira?
 - Hato'o ona difikuldade/nesesidade sira ne'e ba sé? No oinsá?
4. Iha ona ka lae suporta ruma ne'ebé ita-boot sira simu ho tulun husi estensionista?
 - Suporta saida?
 - Husi ne'ebé?
 - Horibainhira mak simu suporta sira ne'e?
5. Ita-boot sira tuir treinamentu ka partisipa iha eventu ruma durante fulan 6 ikus ne'e?
 - Husi sé?
 - Kona-ba saida?
 - Tanba sá hakarak partisipa?
6. To'o iha ne'ebé ita nia envolvimentu kona-ba foti desizaun uza osan husi rendimentu produsaun agrikultura? (ke'e kle'an, uitoan de'it, balun, maioria)
 - Karik loos, oinsá foti desizaun kona-ba uza osan hodi sosa hahán nutritivu? Horibainhira mak halo ida ne'e?
 - Oinsá foti desizaun kona-ba investe fali balun ba to'os?
 - Horibainhira mak halo ida ne'e?
7. Mudansa saida mak ita-boot sira hetan depois de hetan tulun husi estensionista? Kompara ho antes hetan tulun husi estensionista?
 - Pozitivu?
 - Negativu? Tanbasá?
8. Difikuldade saida mak ita-boot sira hetan, bainhira halo enkontru ho estensionista?
9. Saida mak ita-boot sira halo kona-ba prevensaun COVID-19 iha família?

- Halo buat sira ne'e horibainhira?

Obrigada barak

ENTREVISTA SEMI-STRUTURADU HO EA

Konsentimentu/Aseitasaun

Helo, ha'u nia naran (entrevistador) no ha'u nia kolega (karik iha) ohin hau mai iha ne'e atu entrevista (dada lia uitoan) ho ita kona-ba atividade ligasaun servisu estensionista agrikultura ne'ebé halo pilotu iha postu administrativu Balibo, suku Balibo Vila. Ami hatene katak ita halo ona ligasaun ho to'os na'in tarjetu fetu sira hodi fó assisténsia no oportunidade ne'ebé apropiadu iha fulan 6 nia laran.

Agora ami mai atu haree nia progresu oinsá, saida mak la'o diak no saida mak la'o la di'ak ne'ebé presiza atu hadi'a ba iha oin. Maizumenus oras ida atu ko'alia ho ita,

Informasaun ne'ebé ita fó segredu, entre ekipa avaliasaun de'it no sei uza de'it ba programa TOMAK. Ita hakarak atu entrevista? Sim ou lae?

(Entrevistador sei hapara atu entrevista se karik respondente lakohi atu partisipa)

a. Data entrevista	b. Entrevistador
c. Naran respondente	d. Respondente nia seksu
e. Tinan moris:	f. Pozisaun
g. Munisípiu	h. Postu Administrativu
i. Suku:	j. Aldeia:

Knaar Estensionista

1. Informasaun báziku

- Ita servisu ho to'os-na'in tarjetu hamutuk nain hira? (feto)
- Kada grupu ema na'in hira?
- Iha ema ho defisiénsia iha grupu sira ne'e?
- Iha to'os-na'in ho defisiénsia iha ita nia suku? *(Karik iha)* Tanbasá nia la envolve iha ita nia grupu tarjetu?

2. Atividade saida mak ita halo ona hodi tulun to'os-na'in sira? No oinsá?

(Ezemplu: enkontru hodi diskute nesesidade ka difikuldade, enkoraja fetu atu uza oportunidade hato'o sira nia hanoin no iha inisiativa atu buka assisténsia ba sira nia nesesidade nu'udar agrikultór, sst.)

- Oinsá ita nia hanoin kona-ba atividade ne'e? Iha benefísiu ba to'os-na'in fetu sira ka lae? *Sim, Oinsá? Lae, tanbasá?*
- Oinsá to'os-na'in sira nia partisipasaun durante iha enkontru, karik sira ko'alia sai kona-ba sira nia ideia ka difikuldade ne'ebé sira hasoru?
 - Sira ko'alia saida?
- Difikuldade saida mak sira iha no husu ita nia apoiu? Oinsá resolve ida ne'e?
- Suporta saida mak to'os-na'in sira hetan ona husi governu/ONG/TOMAK/parseiru seluk ho ita nia tulun?
- Oinsá ita promove ba to'os-na'in sira kona-ba foti desizaun iha uma laran kona-ba rai no uza rendimentu ba:
 - Sosa ai-han nutritivu ba família (fó ezemplu)
 - Investe ba to'os (ezemplu)

8. Iha to'os-na'in iha grupu tarjetu ne'ebé la ko'alia ka la ativu? *Se karik loos*, meius saida mak ita halo atu sira bele ko'alia no ativu?
9. Mudansa saida mak akontese ba ita nia an rasik depois de envolve iha atividade ne'e? Saida mak ita aprende?
10. Mudansa saida mak akontese ba to'os-na'in sira depois de hetan tulun husi ita? Kompara ho antes?
11. Saida mak ita nia supervisór nia hanoin kona-ba ita nia envolvimentu iha atividade ne'e? Fó apoiu ka la fó apoiu, *se karik lae* tanbasá la apoiu?
12. Dezafiu saida mak ita hasoru durante implementa atividade ida ne'e ho to'os-na'in sira? Oinsá ita resolve dezafiu sira ne'e.
13. Saida mak ita nia hanoin atu bele halo ita nia servisu sai efetivu liu tan ba oin?
14. Hanesan ita hatene ona katak servisu ida agora ita halo daudauk ne'e hanesan pilotu ida/koko atu halo aproximasaun ba to'os-na'in fetu sira. Ezemplu karik TOMAK hakarak habelar tan ba servisu ho estensionista seluk iha futuru, karik ita iha rekomendasaun ruma kona-ba TOMAK tenke uza aproximasaun seluk? (ke'e kle'an: aumenta tan treinamentu, insentivu, no suporta seluk)
15. Saida mak ita halo ho to'os-na'in sira kona-ba prevensaun COVID-19?

Obrigada barak

Aneksu 2: Guia Ligasaun Servisu Estensionista Agríkola

SUMARIU

Igualdade jeneru no inkluzoun sosiál TOMAK (*gender equality and social inclusion* ka GESI) hala'o pilotu hanesan aproximasaun ida hodi hametin servisu ne'ebé mak Ministériu Agrikultura no Peskas (MAP) servisu estensionista agrikultura (EA) fornese ba to'os-na'in feto sira no mós to'os-na'in ho defisiénsia sira. Maski maioria feto mak hola parte barak husi populasaun hanesan to'os-na'in no ema ida husi ema na'in hitu iha mundu mak ema ho defisiénsia, servisu EA barak mak seidak uza aproximasaun inkluzoun sosiál tanba ida ne'e sai hanesan oportunidade di'ak ba EA sira hodi fornese suporta ba to'os-na'in sira ne'ebé mak sai hanesan tarjetu.

Feto EA ida mak hili ona atu lidera suku Balibo Vila no atu aproxima implementasaun ba pilotu ida ne'e. EA iha suku tolu iha viziñu seluk sei observa, aprende no implementa bainhira iha possibilidade, maibé, laiha suporta espesífiku ne'ebé mak fornese ba sira durante iha periode pilotu ne'e. EA ne'ebé mak lidera sei fornese suporta ba tarjetu to'os-na'in feto sira no mós to'os-na'in sira ho defisiénsia, inklui halo ligasaun ho sira hodi fó asisténsia no oportunidade ne'ebé mak apropriadu. EA sei hetan \$20 ba pulsa telemovel kada fulan hodi suporta implementa sira nia papél no responsabilidade ne'ebé mak haruka ona tuir guia ida ne'e. Pilotu ida ne'e sei implementa iha fulan neen nia laran, molok atu halo desizaun kona-ba implementasaun aproximasaun ho EA sira seluk.

OBJETIVU

Fornese tarjetu hodi suporta ba to'os-na'in feto sira inklui to'os-na'in ho defisiénsia sira. Suporta tarjetu ba to'os-na'in sira hodi bele hetan asesu ne'ebé diak liu tan no suporta husi liu husi servisu estensionista ho konkordansia ho MAP ho objetivu ne'ebé mak hamosu ona iha Deklarasaun Maubisse.

PAPEL NO RESPONSABILIDADE

1. Halo mapamentu hodi identifika populasaun tarjetu
 - Dezenvolve lista número telefone husi to'os-na'in feto sira no ema ho defisiénsia iha ita nia área no ponta hahán/animál sira hakiak/kuda
 - Uza mapamentu hanesan instrumentu
2. Fornese suporta ba tarjetu to'os-na'in feto sira
 - Telefone/hasoru malu ho to'os-na'in feto sira hodi diskute sira nia nesiedade/difikuldade
 - Fornese oportunidade ba feto to'os-na'in sira hodi husu perguntas no fahe sira nia opiniaun durante iha enkontru ho grupu ou iha eventu ruma
 - Enkoraja grupu to'os-na'in hodi hili feto atu tuur iha posizasaun lideransa iha grupu sira
 - Liga ho organizasaun feto ne'ebé mak bele fornese suporta espesífiku ruma
3. Fornese suporta ba tarjetu to'os-na'in sira inklui sira ho defisiénsia sira
 - Asegura enkontru grupu ne'ebé mak hala'o iha ita nia área katak to'os-na'in sira bele asesu ho mobilidade menus
 - Asegura grupu to'os-na'in sira nia enkontru katak iha asesibilidade ba ema hotu ou difisil atu rona
 - Liga to'os-na'in ho defisiénsia sira ba asisténsia defisiénsia bainhira sira husu ajuda
 - Uza teknolojia ne'ebé mak apropriadu ba ema ho defisiénsia sira atu asesu (jardin xave matan, fugaun rai, nsst).
4. Liga to'os-na'in sira ho asisténsia estensaun nia ne'ebé mak apropriadu

- Fasilita to'os-na'in sira atu husu perguntas ba facilidade ou materiais husi MAP (ekipamentus, makina nsst).
 - Suporta to'os-na'in sira hodi prepara proposta bainhira iha oportunidade ba fundus espesifiku ruma
 - Liga to'os-na'in sira ho treinamentu ne'ebé mak fornese husi MAP ou oportunidade treinamentu seluk
5. Promove komunikasaun di'ak no fahe informasaun kona-ba prosesu foti desizaun iha família ho to'os-na'in sira hotu.
- Enkoraja família to'os-na'in atu foti desizaun hamutuk kona-ba oinsá rai no gasta sira nia rendimentu, no hanoin didi'ak kona-ba oinsá rai hodi bele hola ai-han nutritivu no investe ba agrikultura.
 - Diskute ho fetu ho mane sira nia papél iha to'os no oinsá prepara ai-han. Diskute estratéjia ho to'os-na'in sira oinsá jere sira nia servisu hodi nune'e sira iha tempu atu asegura sira nia família oinsá han hahán nutritivu, partikularmentu bainhira sira okupadu iha tempu produsaun.
6. Fó atensaun ba servisu to'os-na'in fetu sira ho ema ho defisiénsia sira.
- Durante enkontru EA regular ou relatóriu ba supervisór sira, fó atensaun ba servisu to'os-na'in fetu sira inklui to'os-na'in ho defisiénsia sira, inklui sira nia susesu no difikuldade.
7. Monitorizasaun ba fornese suporta seluk
- Kontinua halo monitorizasaun
 - Halo kontaktu regular ho ekipa TOMAK hodi fahe progresu no hetan suporta
8. Fahe informasaun relevantes kona-ba COVID-19 ho to'os-na'in sira
- Fahe informasaun preventivu kona-ba COVID-19 ne'ebé hanesan

SERVISU REDE REFERÁL NO NÚMERU KONTAKTU DETALLA

Naran organizasaun	Deskrisaun	Kontaktu pesoál	Númeru kontaktu
TOMAK	Programa agrikultura; suporta husi Governu Austrália	Cecilia da Fonseca	77548833
		Orlandina Leite	78065004
RHTO	Organizasaun nasionál servisu ho ema ho defisiénsia – pontu fokál iha Bobonaro	Arcanjo do Santos Guilermina	75921187/78142123 77288287
OHM	Programa agrikultura & ASN, hakbi'it ekonomia fetu, jéneru nsst.	Rince Napo	77615050
MSSI	Fornese assisténsia ba ema vulneravel sira	MSSI	3310501-3310219
VPU	Fornese assisténsia ba ema fetu vulneravel sira liu husi servisu rede referál	VPU Nasionál	3310282
Asosiasaun Fetu	Pontu fokál establese husi SEII ne'ebé mak fornese assisténsia no liga ho organizasaun hotu-hotu; inklui organizasaun fetu, grupu fetu no vulneravel sira iha baze iha munisípiu hotu	Viqueque Baucau Bobonaro	77349301 77259413 77246286

MONITORIZASAUN

Responsabilidade Ligasaun EA nian:

EA ne'ebé mak halo ligasaun tenke iha notas ba interasaun hotu ho to'os-na'in feto sira no mós to'os-na'in ho defisiénsia sira uza instrumentu monitorizasaun ne'ebé mak iha kraik. EA Ligasaun tenke halo kontaktu másimu dala tolu (3) (liu husi telemovel ou oin) ba oin ho populasaun tarjetu kada fulan. Kopia instrumentu monitorizasaun sei fornese husi ekipa TOMAK iha kada fulan ikus.

Responsabilidade husi ekipa TOMAK

Ekipa TOMAK sei kontaktu EA ne'ebé mak lidera kada fulan hodi diskute progresu husi instrumentu monitorizasaun ligasaun ne'ebé mak iha instrumentu monitorizasaun no fó feedback hamutuk ho EA. Ekipa TOMAK sei husu perguntas hanesan tuir mai ne'e:

1. Saida mak la'o di'ak iha fulan kotuk?
2. Difikuldade saida mak ita-boot sira hasoru iha fulan kotuk?
3. Suporta seluk ne'ebé mak ita-boot sira husu husi ekipa TOMAK ou MAP?
4. Iha buat seluk ne'ebé mak ita-boot sira hakarak atu diskute?

Depois de implementasaun fulan neen, ekipa TOMAK sei hala'o entrevista ho to'os-na'in feto sira ne'ebé mak sai alvu tarjetu durante pilotu hodi avalia sira nia esperiénsia husi pilotu, inklui impaktu ne'ebé mak sira hetan hanesan rezultadu husi pilotu.

Instrumentu ba mapamentu fetu to'os-na'in sira no to'os-na'in ho defisiénsia

Naran EA: _____

Suku: _____

No	Aldeia	Naran to'os-na'in	Idade	Defisiénsia			Ai-horis ne'ebé mak kuda	Animál ne'ebé mak hakiak	Notas
				S	L	Tipu defisiénsia			

Instrumentu interasaun ba monitorizasaun ho to'os-na'in feto sira no to'os-na'in sira ho defisiensia

Naran EA: _____

Suku: _____

No	Data	Tlf / vizita		Aldeia to'os-na'in	Naran no idade to'os-na'in / tipu grupu	Seksu		Defisiensia		Sumariu husi kontaktu	Follow-up/ asaun tuir mai
		T	V			F	M	S	L		
1											
2											
3											



TOMAK Timor-Leste



@TOMAKTimorLeste

www.tomak.org | info@tomak.org



Adam Smith International



@adamsmithint



TOMAK